

第四部

成熟

Chit-ê 混亂 ê 世界 siōng 需要 ê 是成熟基督徒 ê 積極影響。這是 tī 咱現代世俗社會複雜 ê 結構中，ē-tàng 感受 tiòh 耶穌基督影響力 siōng 好 ê 途徑。咱中間敬拜基督 ê 人 lóng 真清楚耶穌用來促進和平、公義、自由、基本人權、赦免別人，kah 減輕苦難 ê 人性 koh 實用 ê 方法。Chit-ê 有醫療作用 ê 事奉會解決困擾世界 ê 真 chē 問題。Chit 面旗 á siōng 好是由成熟 ê 基督徒 giáh 起來 koh giáh teh 行。

咱基督徒所受 ê 教示是，tiòh 謝絕利己害人 ê tai-chì，koh 參與 kah 理解 hiah-ê kah 咱無全款 ê 人，in tiān-tiān 遭受歧視、虐待、孤立 kah 忽視。無論是身為公務人員 á 是一般公民，咱 lóng ē-tàng 採納耶穌 ê 勸告：「Kā 凱撒 ê 歸凱撒，kā 上帝 ê 歸上帝。」Tī 融合私人 kah 公眾生活 ê 時，咱必須面對嚴重 kah 敏感 ê 挑戰，m-koh，成熟 ê 基督徒有能力用智慧 kah 正確 ê 判斷，來適應 chit 種 ê 衝突壓力。

通過祈禱，不斷諮詢上帝來加強家己，成熟 ê 基督徒會堅持克服障礙，koh 充分利用每一個可能 ê 機會，來 hō' 家己 kah 四 kho' 圍 ê 人 ê 生活發生有利 ê 改變。上帝 mā 挑戰咱去擴充咱個人影響力 ê 界線。耶穌講：「Hō' 伊 khah chē ê 人，會 tùi 伊 thèh khah chē。」(路加 12：48)。

Tī chit 部分，咱 beh 探討 án 怎 kā 咱 siōng 好 ê 獻 hō' 上帝；採用高標準 ê 優先；保持無驕傲 á 是傲慢 ê 自信；通過 kah 人合作來擴大咱 ê 影響力；以及 tī 聖神影響力 ê 引 chhōa 下，繼續起造咱信仰 ê 基礎。

上帝再次保證所有接受屬靈成熟責任 ê 人，in 是「tùi 祂榮耀 ê 大能來得 tiòh 氣力，堅強起來，hō' lín 有耐心來忍受一切。」(歌羅西書 1：11)。